



ATASSUT

Siverth K. Heilmann

UPA 2016/ 40 & 141-1

19. 04. 2016.

Nunatta pissarititaanik qimminut uumasuutinullu allanut nerisassianik, pisortanit namminersortunillu pigineqataaffiusumik tunisassiorneq, imminut akilersinnaasumik ingerlanneqarsinnaanersoq paasiniallugu, Naalakkersuisut Upernaakkut Ataatsimiinnermi 2017-imi agguassassamik nalunaarusiornissaannik peqquneqarnissaannik inatsisartut aalajangiiffigisassaattut siunnersuut.

(Inatsisartuni ilaasortaq Petter Olsen, Inuit Ataqatigiit)

Qimminut nerukkaatissiorfimmik nunatsinni pilersitsisoqarsinnaaneranut iluaqutissartai ajoqutissartaalu pillugit Naalakkersuisut UPA 2017-imut nalunaarusiamik suliniuteqaqqullugit piomasaaqatinnngortussat tunisassiornissamullu tunngasut ilanngullugit. inatsisartut alajangiiffigisassaattut siunnersuut. Tamatumani aningaasaqarnikkut piomasaaqatinnngortussat tunisassiornissamullu tunngasut ilanngullugit.

(Inatsisartuni ilaasortaq Anthon Frederiksen, Partii Naleraq)

Siunnersuutitut qulequtarineqartut marluk, aatsaallu maani inimi eqqartorneqalinngitsut pillugit, inatsisartuni ilaasortaq Peter Olsen, Inuit Ataqatigiit aamma Anthon Frederiksen Partii Naleraq aalajangiiffigisassatut siunnersuugteqarnissinni qujanaq, imatullu ATASSUT-miit oqaaseqarfigissavagut.

Nunami imaanilu umaatsunik uumassusilinnillu ulikkaarneraalluni, Peter Olsen oqariartornera ATASSUT-miit ilumoorneraannassavatsigit, naak siusinnerusukkut, Inuit Ataqatigiit Naalakkersuisuutitaqarnerisa nalaanni, peqassuseq pisuussutit uumassusillit pillugit muminganik oqariartuuteqartuaraluartut.

ATASSUT-miit ilisimalluarparput oqariartuutiugarlugulu, pinngortitap allanngorartuarnerata kingunerisaanik, immami nunamilu pisuussutit uumassusillit peqassutsikkut nikerartuartsut, taamattumik inatsisiliortutut aalisariaatsit piniariaatsillu, matumani tunisassiorneq ilanngullugu, naleqqussartuarnissarput avaqqunneqarsinnaasannginera ATASSUT-miit eqqaassisutigissavarput.

ATASSUT-miit oqariartuutigisakkatta ilagaat, pingaartumik aalisarnermi, aalisagaq sunaluunniit pisarisuugaq igiinnarneqartanninnissaa kiisalu aalisagaq qaqinneqartoq tamaviat tunisassiarineqarnissaanut aningaasarsiutiginnissaanullu, niuvernermi nunat sanilerisatta soorlu Island-imi Savalimmiunilu, takusariikkagut ilisimaleriikkagullu ilinniarfigalugit tunisassiornitsinni Naalakkersuisutigoortumik (RG-ip) tunisassiorfiini piumasagaateqartariaqalersugut.

Nunarsuarmi nerisussarpasuaqarpoq, niuverfigisinnaasatsinnik aammalu immitsinnut pilersornerulernissatsinnik politikkeqarnitta qulaanilu siunnersuutit pitsaasut inerisarneqassappata oqaluinnarata alloriartariaqalerpugut. Naalakkersuisut siunnersuutinut akissuteqataanni maluginiannitsoorneqarsinnaanngilaq, Neqi A/S nunatsinni tunisassiassanik qimminut nerukkaasiortalernissamik siunniussaqaqarnermi siuarsimasorujussuaq. ATASSUT-miit nutaarsiassaq nuannaarutigaarput isumalluarfigalugulu.

Kalaaliusugut pilisarneq pingaartitarilluinnagaraarput, piniartortattali kalaalimineerniarfinni ullutsinnut nalequnnerusumik tunisassiorsinnaanerata aqqutissiuukkaluarlugulu, nukilalaarnartarpoq inatsisitigut aporfissat suli anigorniagassagut amerlammata, taamaatumillu inuussutissaqalerinermi inatsisip tamakkiisumik nunatsinnut oqqunnissaa saneqqunneqarsinnaanngitsoq matumuuna ATASSUT-miit oqariartuutigeqqissavarput.

Anthon Frederiksen Partii Naleqqamiit tunngavilersuuteqarnermini, Nunatsinni Brugsen-ip paasissutissiisimaneranut saqqummiunneqartunut soqutigintartunut qujanaq. Ilumoorluinnarpoq suliffeqarfimmi ataasinnarmiluunniit takuneqarsinnaammat, nioqqutissanik avataaniit eqqussukkat aammalu nioqqutissat ullussaminnik qaangiisimasunut kasiileerneqartartut aningaasanngorlugit qanoq annertutigilluinnarneri.

Ilisimalluarpara puiserpassuit amiiginnariarlugit, neqqaalu kalaalimineerniarfinni allaniluunniit tunisinnaanngisagut imaanut kiviortartiinnartarpagut. Piniartut aningaasarsiornerat iluaquserniarlugu

inatsisartuni anguniarsimagaluarpara, Maniitsumi allaaveqarluta, frysekontain-erillu puisit amiginnakkanik ilivitsukkaanik immeriarlugit akisunngitsumik, qimmit nerukkaatissaatut qimuttoqarfimmiunut piumaneqaraluaqisunullu aqqutissiuussigaluarput. Taamaattoq qimmit inuttulli aamma nerukkaasersorneqarnerisa inatsisitigut illersorneqarmatagooq naamerluinnaq itigartinneqarpoq. Taamaattormi piumalluinnartut namminneq akisussaaffigisaannik, umiarsuartigut pilersorneqartarnerat iluatsilluartumik atorneqartarpoq.

Naggataagut ATASSUT-miit inatsisartunut eqqaasissutigerusupparput, aalisakkat perlukuinik fiskemel-eqarneq aalisagaqarluarnerata nalaani Maniitsumi ukiorpassuarni ingerlanikummat, taamattumillu nerukkaatissiornermi allatulluunnit niuvernermi iluaqutiginiarneqarnerunissaanik isumaqarneq pitsaasuvoq, aammali angallatit puttasut taamatut siunertaqaraanni atorneqarsinnaalereermata ATASSUT-miit eqqaasissutigalugu isumaliutigisassanut ilanngupparput.

Taamatut ATASSUT-miit oqaaseqarluta, aalajangiiffigisassatut siunnersuutit marluusut assigiilluinnangajammillu siunertaqartut tamaasa akuersaarlugit, suliat aappassaaneerneqannginnerminni ataatsimiititaliami susassaqtumi peqqissaarullugit suliarineqarnissaat inassutigissavarput.